

續修四庫全書



《續修四庫全書》編纂委員會編

續修四庫全書

上海古籍出版社

一五六〇・集部・別集類

仿潛齋詩鈔十五卷（卷十至卷十五）〔清〕李嘉樂撰……………一

澤雅堂詩集六卷〔清〕施補華撰……………八一

澤雅堂詩二集十八卷〔清〕施補華撰……………一四七

澤雅堂文集八卷〔清〕施補華撰……………二八三

儀顧堂集二十卷〔清〕陸心源撰……………三七五

敬孚類藁十六卷（卷一至卷四）〔清〕蕭穆撰……………六〇九

仿潛齋詩鈔卷十

趨朝集

光州 李嘉樂 憲之

四月十九日移寓本街南頭

高聳槐雙樹低遮屋數閒遙看似車蓋難得近柴關我
取人先棄心清境自閒莫嫌湫隘甚依舊枕西山
助僕抱琴書無煩更借車四鄰仍舊識數武卽新居地
僻饒甜水情多戀故墟晨昏勤洒埽吾亦愛吾廬

懸匏廬舊額於廳事

人生到處都如繫四顧新廬又一匏大海濤聲猶在耳
不容易得蓋頭茅

仿潛齋詩鈔卷十

一

屋後闢一窗正對西山下臨花圃喜極有作

都城無夜不防賊厚其垣墉益加密我門向東山在西
屋後奇峯跳不出穴宮楚有圍公陽偶一效之計良得
指揮巧者闢後窗嵌以頗黎無雕飾居然眼界放光明
遙岫森森相對立山靈似爲悅己容各聳煙鬟不肯匿
腐儒於世百無能自矜傳得移山術朝晴暮雨幾同看
疊嶂層巒一時集快心拍案忽狂叫長安萬戶誰能及
彼蒼憐我背青山亦似朱門疎促膝俾以今生識太行
清光耿耿填胸臆眼前點綴景都佳蕭寺葦塘望無極
縱使穿窬半夜來畢卓甘甯願相識若無渠耶恃陋心

安得宗炳卧遊室窗前況有灌園翁秋圃丹黃好顏色
我不買山爾賣花都是天生非人力

後園有室額曰野人家新築土几時與家人共飯

槐樹下

鑿坏眞箇野人家自拾枯枝自煮茶新綠陰中閒意趣
輒紅塵裏冷生涯三餐團坐妻兒女兼味紛羅瓠韭茄
熱客不來欣獨醉閉門未覺是京華

京寓字紙雜詠

俸票

片紙相沿舊制精斗升品秩並詳明此中有字飢堪煮

仿潛齋詩鈔卷十

二

惟士無田祿代耕食粟尙須操左券分金兼可抵奇贏
米折用銀盛時何用腰頻折氣節從知要養成

房摺

縱教賃廡亦催租摺疊痕新豈可無百口保卿勞市井
摺用鋪保兩頭屈我奇妻孥浮家乏術成三徒賜第何
年得一區笑及肩牆礙眉戶依然而月迫迫呼

錢帖

五銖成貫重難挑准折全憑字一條轉惜飛蚨空費血
卽逢瘦鶴易纏腰錢神合仗靈符畫紙貴仍防贗本描
白鏹有時同此例取攜又比孔方驕

仿潛齋詩鈔

二

〔清〕李嘉樂撰

據山東省圖書館藏清光緒十五年刻本影印原書版框高一六七毫米寬二六四毫米

館券

酒家只恐酒人稀
適館留賓緩綏歸
席散纔教書醉壘
朝回不惜典春衣
每逢佳節門前立
重認塗痕紙上飛
焚券馮驩何處去
後來食客更誰依

門簿

歲朝名紙滿門闔
方過春風客已疏
如市休援相見禮
閉關却異絕交書
人前留此題凡鳥
事後憑他飽蠹魚
爲誠司閭勤執筆
尙多長者肯停車

知單

吉凶赴告萬家稠
到處書名闕未休
執紼方爲東郭弔

仿潛齋詩鈔

卷十

三

稱觴又解北堂憂
誰教紙筆憑傳語
可惜風塵尙應酬
老不往來思上古
結繩豈復廣交游

用帳

米鹽瑣碎酒醺繁
筆底分條不憚煩
豈比陶朱家可富
本非桑孔利能言
一嫌一字心猶市
千日千錢弊有源
冷案孤燈親手記
每隨詩草共掀翻

報條

木紅紙列字欹斜
糊向門旁氣頓華
此輩稱名宜喜鵲
無端書法愛塗鴉
差償白首爲郎苦
便作青雲得路誇
結伴疾呼頻索賞
只愁聒耳惱鄰家

考差以銷假逾期未與自慰

藝苑重考差先期核員數
乞假限歸期雁後花前赴若
逾季冬月勢難驥尾附
雖未實防風塗山逢彼怒但似
數駒支嘉會不得與省親
我後期還朝時春暮只堪舞
雪風未許登高賦人皆惜向隅
獨不妄生慕回憶三戰
年一遇雨不遇待免獲效虛禱
馬吉神護丁卯癸酉均不得差庚午
考得會房徒令望眼穿未履輜軒路
今超得失林頗有旁觀
趣同館簪筆忙我懷如平素
明年屆正科或戴使星去

自嘲

十年又得近神山
舟遇回風輒引還
兩度殿前同作賦

仿潛齋詩鈔

卷十

四

看人超出眾仙班

千有餘篇齊進御
漢皇最愛讀凌雲
築壇本爲無雙士
愧少雄才震一軍

或聘予爲西席不就

貴胄偏能覓腐儒
此生幸免硯田俱
士如畫餅空千世
我欲溫經懶授徒
問字應來揚子宅
聘珍笑謝霍家奴
尋常雅集猶思避
何況朱門是畏途

自遣

畢竟蓬萊境是仙
還餘祿米助炊烟
太康士負清閒日
平進官多冷澹緣
懷刺何堪趨馬廐
請纓未若抱蟬編

亦非楊柳甘拳曲繩墨相尋或偶然

答客問近狀

天機清妙處無事用商量早睡緣宵短加餐覺晝長喧
嫌門近市寂盼客登堂隨遇安吾分年華易坐荒

喜香谷自陝西還京

去年結伴策征驂汝自參軍我自歸別後分途游海嶽
客中末路是京畿也知驚風難棲棘還望驂驢勉受羈
深羨興豪腰腳健喜從險處陟崔嵬

君登華岳絕頂

晚步黑窯廠

時向幽偏境一行蕭然景物慰閒情斷雲開口雨吞吐

仿潛齋詩鈔

卷十

五

高樹掉頭風送迎連歲客懷堪獨喻此閒野趣是天生
絃歌誰設江亭譙車馬喧闐稱玉京

同香谷邀周子謙比部

益作詩鐘於野人家

舊游星散復來歸重整騷壇興欲飛鉢韻鏗鏘催手筆
詩材細碎關心機花閒烟淨茶香熟樹底風涼酒力微
指點教人行樂處開窗亂塚立斜暉

與鄔筱山李蘊齋王介艇丁巡春諸編修會課

癩結人間翰墨緣聯吟高會玉堂仙斯文風氣方趨下
我輩功名總聽天難得鄉情都契合須知時藝亦流傳
荆山尚欲來同社看是誰先著祖鞭

謂唐春卿編修

錚兒病香谷醫之而愈

兒生方兩年氣血介強弱仲秋方六日寒暑忽為虐驚
掣手足疲薰蒸肺腸灼京國醫多庸了不知脈絡待斃
冀救援全家皆駭愕頓念登嶽人近方釋芒屨儒醫不
苟同病源耐尋索檢書得古方泰意用良藥沈疴有轉
機如物初解縛調理慎防閑微軀猶瘦削兒命竟苟延
天心費斟酌君倘留戎幕誰與寬困約我如駕星輶誰
與堅付託凡事皆前定大智不穿鑿有私第五倫幾至
錯一著

飲酒

仿潛齋詩鈔

卷十

六

西風吹冷客心孤消遣閒時酒一壺百卉經秋都結子
斷鴻叫夜願為奴物情榮悴如人事天意蒼茫困我徒
自惜書生無用處他年史傳恐模糊

引見後大病

御史缺出例帶前列三名引見不到者候處分

兒愈我還病頻來二豎纏安心聊度日努力尙朝天門
峻登龍晚臺高繡豸鮮虞車防吏詰或可壓災年

賊穴壁驚覺僅竊轡去戲作

誰甘結讖怨疏狂徒擾寒宵夢一場梁上無煩教鑿壁
不因餘火况偷光

空空一擊翻然去彼亦人間轍綫才留得青蓮吾故物

何妨赤腳雪中來

哭楊芸閣比部

秋曹潦倒病難興十七年來苦不勝龍性難馴方習嬾
蝸居雖窄愛攜朋讀書僅作清談助吞藥還愁舊債增
痛惜無家惟友殯臨終跌坐影如僧忽自起跌坐而逝
于與香谷親見之

十二月十二日補福建道御史

改官又荷

聖恩宣回首芸香俸十年驄馬有時閑道路蠹魚無命
作神仙手修史傳新編竟骨鍊風霜舊日堅砥礪半生
償夙願萬言書奏九重天

仿潛齋詩鈔 卷十

七

買車

短轅猶是故人餘賤值堪酬勞竟書僕售芸閣車
以十金易之從

此東華風月夜趨朝不患出無車

丙子元旦

朝參事畢酒徐斟吹面東風又一臨朋偶寄金僮色喜
春頻改歲客愁深預儲疏草丹心勵常夢慈闈白髮侵
意薄上書蘇季子只因裘敝返山林

春寒

宦久詩情減春寒酒量增輜軒同學貴粗綬異途隱
患誰先覺奇才未可憑孟嘗今已渺甘效客無能

書懷三十首再用鐵琴山人前韻

七尺軀螳一畝宮生涯可惜付飛蓬陶情偶爾招今雨
處事如余慕古風真率性方歸踏實縱橫家每喜翻空
長安走馬雖容易笏鳳依然傲塾蟲

掃盡尋常芥蒂胸官場落拓坐疏慵大言賦就詞成鏗
小技羞談試及鋒起舞雄懷雞五夜行吟雌伏蠹三冬
前程黑漆誰能識猶望功名上景鐘

百家著作語紛囁供我掀翻坐小窗樓比登天箋造五
船稱下水漿飛雙鬢心壺爲高歌擊警耳鐘如善問撞
風雨名山曾尙友休驚陸海並潘江

仿潛齋詩鈔 卷十

八

世情閱歷險如夷日久聞香室裏戒守丹書期少過
神交青史闕多疑名賢理境參三昧廉吏家風懷四知
賸有孫吳難盡讀敢言才大不逢時

怡情魚躍與鳶飛心靜深知命理微可有堂開名是是
曾無屋漏想非非斬蛟勇力鏖文陣捫蝨高談解議圍
閉戶何妨多歲月當年張鷟夢衣緋

桑弧憶祝我生初誰料仍乘下澤車此際長卿呼美酒
何時老父授奇書鞭開道路慚驚馬絨達關河渺鯉魚
幸值昇平文物盛寄居亦可愛吾廬

松菊逍遙徑未蕪理財豈解計租銖締緣或指三生石

記事應拈一串珠李白酒酣吞力士樵青茶熟奉狂奴
昂頭天外心無著羨煞壺公賣藥壺

駿足馳驅竹耳批記會行色壯蓬萊德衰舉世悲歌鳳
年少鍾情戒鬪雞沒羽有時摧虎石關心何處印鴻泥
詩吟出塞精神振長鋏隨身旦暮攜

漢江浪擁旆旌排射策軍門願易垂喜共新知披竹簡
不將舊夢戀芒鞋拔茅幸許依千厦建樹空期進一階
鐵馬金戈緣半載楚氛甚惡走天涯

戰場躍馬志休願望裏山川劫後灰膽氣飛揚凌玉塞
角聲嗚咽訪金臺賊窮指日潛蹤去民困臨風灑淚來

仿潛齋詩鈔

卷十

九

目覩伯牙遺跡在知音千古沒蒿萊

霜飛萬竈夜然薪小住軍營亦夙因涑水憐兄寒月魄
豫章省父仗風神食尋李下誠廉士歌起蘆中定異人
宦久高堂歸故里頓思負米樂清貧

歸來季子惜陰分問陣從茲廣見聞時事心寒空耀武
儒生耳熱且論文苦吟早印千川月甜睡遲看萬壑雲
到底閒中多靜趣境清何用妙香焚

椿萱雙茂絆羈魂笑舞萊衣燦彩痕日晷愛深臨爾室
天倫事樂萃吾門奔波道路遨遊悔逝水年華喜懼存
縱博科名疏侍奉不如嘯傲浣花村

高擁書城孰共觀依依弱弟最相安萼聯樓上輝難掩
草秀塘邊夢不寒旅館暫教行斷雁名場每勵序排鸞
十年親督晨昏課駒隙青春未肯寬

靈均有姊隔江關妹比班昭稿共刪微雪絮吟歡聚首
大雷書寄遠開顏結縞薄命差相似分袂多年尚未還
爭得遄歸圓骨肉也如總角味清閒

故園佳趣口難傳福地娜環業可專寫意言真同說鬼
讀書味豈異升仙骨妨俗累須求艾胸養清機自愛蓮
那識希夷當日事戰爭未罷竟高眠

茫茫天海舌休饒舊有吟魂暗裏銷不喜詞源揮麈尾

仿潛齋詩鈔

卷十

十

尙慚詩稿載牛腰心疑出岫雲羣觸目覩歸船雨亂跳
妙景當前無所慕五陵年少鬧笙簫

典記休將腹笥嘲終朝函文許推敲爲嚴禮數忘風雪
恐負時光逐水泡卷卷奇書觀卓犖硜硜故見掃礫碣
師門屈指皆名士刪改文成手自抄

濁酒狂歌興極豪鈞天樂欲聽雲璈得朋誼似枝枝附
酬世時嫌草草勞曲奏瑤琴期賞識交聯鐵硯待薰陶
多聞詎肯安孤陋三益相望徑翦蒿

江山陳迹舊吟哦燕趙生成慷慨多子夜猶聞歌碧海
兒時曾記渡黃河名珍沒世皮留豹路阻還鄉足借駝

更識匡廬眞面目吳頭楚尾幾經過

纔觀朝暉又暮霞無聊意緒亂悲茄濟人孰立中流砥
結客難尋博浪沙左氏文章藏作癖右軍書法嗜如痴
年來漸得安心法窗外花枝爛漫誇

好癖何事炫衣裳接物心含一瓣香倚伏無端徵失馬
紛歧有路感忘羊酒酣獨酌新豐市詩苦同吟古戰場
共楊祖劉爭起舞中原馳騁幾人忙

石隱還多約耦耕海疆暫靖孰關情紅牙謝絕看磨劍
赤手支持羨請纓魯縞勢窮猶挽弩吳鉤心壯待分羹
讀書萬卷因何事尙戀秋林景色清

仿潛齋詩鈔

卷十

十

喧傳伏莽不堪聽缺斧東山雨罷霽已竭壺漿攻曠日
難憑杯酒勸長星軍前一水公無渡澤畔三閭我獨醒
每念滄溟魚跋扈濠梁那得學忘形

性情容易露剛稜塵海銷磨識見增季世威方矜夏日
先賢訓總懷春冰留心天下才分斗寄跡人間瞻似升
兀兀窮年眞迅速繫將駒影少長繩

時局澄清意未休談兵杜牧暗含愁用材莫更求人備
建策還當責已周世待轉機隨將帥權能造命望王侯
詞章報國書生事豈羨登仙擁八驄

遊秦失路盡黃金寂寞風雲落日沈賦奏長楊慚學淺

夢縈細柳感懷深繞廬周走餘悲憤擊節商歌愛朗吟
近與拾遺官不異詩篇傳寫古猶今

面壁功深坐石菴蒲編對我味回甘嘯歌也貴心無二
辨說徒聞耳有三頁頁連呼因寡識行行且止莫多談
陰符何足終身誦萬事徐從靜裏參

排日奚囊有句添邯鄲道上夢頻甜史繙白屋懷先壯
經寫黃庭課亦嚴火色鳶肩羞肉食春冰虎尾慎毫拈
何當身事酬粗定更把禪心向絮沾

蘭臺高處俯塵凡萬里風清透葛衫蔓草荒烟辭短棹
梅花明月謝長鏡從龍未許卑莘野圖象從知慕傅巖

仿潛齋詩鈔

卷十

十

誓再讀書兼養氣一條冰不負頭銜

讀南疆繹史

十日揚州戰血鮮新聲樂部正朝天可憐餘運福王一
讓與梅花墓萬年

遺臣曲計思完髮餘賊鳴威喜剝皮犴烏蠻花雨淒絕
也曾迎輦到河隄

厓山結局復相同閩粵流離作寓公太息孤臣雙血淚
對天灑向海門風

死報前明養士恩終邀旌典俗常敦殷頑不悟周新命
紅袖緇流總怨魂

仿潛齋詩鈔卷十一

使粵集

光州 李嘉樂 憲之

丙子閏五月十二日奉

命充廣西副考官次日午門前謝

恩恭紀二首

御筆僉名

帝澤深皇華四牡驟駸駸十年舊倖叨共館萬里清風

動桂林盛世威靈龍虎節高科文字鳳鸞音微臣稱職

無他術仍仗冰壺一片心

南征倦鳥昨飛還今喜乘輶化百蠻足繭半留天下跡

仿潛齋詩鈔

卷十一

一

眼波又看粵西山材搜梧柳千巖外詩在湘灘二水間

更望歸程將母日疎蘭稍慰鬢毛斑

擬差政日
乞假省母

十七日大雨

去年仲秋六日雨距今三百有十日北方耐旱終不支

老農坐守枯苗泣我行萬里畏驕陽愁對道旁人骨立

傾盆大雨五六時萬朽俱蘇伊誰力始知久晴非天意

補種秋禾徧黍稷微官敢道憂民憂便爲身謀此亦急

奉使終年始克歸妻孥一飽差堪必友人設饒且踏泥

那怕行裝衣盡涇

二十四日偕朱石峯編修

文鏡

出都

西山著意疊烟嵐樹色蕭森水氣酣回首國門三四里
雨餘風景幻江南

晚宿良鄉

縱橫穀穗鬱青蒼小住畿南第一鄉時雨同聲歌帝力

農夫歡喜我清涼

涿州偶成

廟貌桓侯壯樓桑氣鬱蔥君臣共間里屠販起英雄人

顧草廬雅字銘刁斗工涿州重駐馬再拜仰遺風

宿北河謁楊椒山先生祠

三百年宗社權奸積禍深青詞矜相業白簡奮臣心戰

仿潛齋詩鈔

卷十一

二

馬前朝市神龍何處尋鈴山堂在否遺臭早銷沈

尖涇陽驛屋甚朽敗石峯先至觸其氣幾病作歌

慰之

涇雨生霉土窗暗涇陽驛前弛負擔幽氣陰森巧中人

室不高明鬼亦瞰同行微疾本偶然僕輩無知生畏憚

我能續作正氣歌縱有疑團立剖斷溽暑南征瘴癘鄉

戒心終日恒居半前車覆轍豈足驚

上科陸
君道辛

忠信波濤

可無憾古賢遷謫尚怡然何況星軺光瑾瑜口銜詔命

振風雷天地復旦氣平旦宴安酖毒隔下居五日長安

愁不汗置之死地而後生兵法部勒心休亂火風融融

夾日飛天學嵇康性好鍛鍊作銅筋魑魅逃萬里生還
成鐵漢交聞斯言意釋然呼僮侑我爵無算午餐笑指
望都行奕奕神光熾如炭

定州

飛沙作雨灑城關蔓草連天障市閭刺有一拳奇石在
千秋雪浪照中山

六月朔日抵新樂縣和亡友蕭仁庵比部壁間韻

蕭郎墨蹟認斯盧文字論交憶上都我始乘軺君已逝
果然天道厄吾徒

附原作

蕭麟德

仿潛齋詩鈔 卷十一

三

中元四日別吾廬屈指中秋達 帝都客路者番逢

二妙一強項令一囚徒 白注癸酉八月奉母入都遇
何春岩以知縣分汴遇胡汝

臣自成所釋歸
示以詩集云云

至正定府崇因寺題觀音閣

禪關暫駐登臨壯傑閣崑崙壓郡城畿輔南來平野闊
太行西抱塞雲橫風前高樹秋先覺雨後遙天氣廓清
七渡滹沱成底事浪聲沙迹最分明

樂城懷古

三蘇高宋代一尉重樂城養氣言文字當官想政聲雷
州甘謫宦雨夜苦憐兄唐棣詩誰繼奇才有至情

趙州大石橋阻雨登閣觀舊題字

且弊趙州茶橋邊又駐車仙靈俗附會舊迹字槎枒夏
潦程難定秋風信尚賒衝泥行役苦卻喜少塵沙

東尹村阻水小憩真原寺

梵宮創建溯隋皇紺碧今成瓦礫場重建碑書金大定
獨存殿讓魯靈光秫田半畝供僧粥草舍三楹上佛香
不識前津消漲未閒從古寺考興亡

沙河縣途次水深且廣例用水夫肩輿徒步而身
有長短用力不齊將至傾側乃令長者舉杆短
者承底勞逸既均眾亦悅服戲紀以詩

仿潛齋詩鈔 卷十一

四

往歲沙河常不雨沙深沒車無寸土今年沙河雨太多
水深無舟途更苦縣官利速使者行數十水夫供予取
身非布帛長短同體既參差力難努與中人代出奇謀
長狄矮張各為伍聳輿杆用今曹交戴輿底用短于簿
經調劑後兩得平既不仰企兼不僕如百足蟲浮水中
免欹斜賴齊步武破浪橫行足有音中流小立氣煩吐
許以搞貲勞以詞滅頂堪堪百鈞舉頃刻達岸險如夷
眾夫亦愛吾不腐雖殊折葦渡長江聊可搏人希上古

渡洛河

黑夜傾盆雨不休洛河濁浪抱關流烽烟久已邊防撤

溝洫誰將水利修
麻炬然燈難照路
柳條編筏代行舟
同官遙羨乘槎好
豈信艱危歷道周

題盧生祠

往返祠前今七度
頗思超悟出風塵
那知傳食臨郵舍
依舊黃梁夢裏身

此行人盡比登仙
真箇登仙卻少緣
漫薄公侯無足數
勳名不朽也千年

邯鄲

曠野斜暉抱遠城
邯鄲憑弔古時情
因人成事趙盟楚
奇貨可居呂易贏
六國驅除歸漢幟
百家游說釀秦坑

仿潛齋詩鈔

卷十一

五

世間還是神仙易
只向黃梁夢裏行

杜村北十里車騎關
相傳楊七將軍所守土人祀

之

關隘俗傳楊業子
里居人重杜喬鄉
豐年父老閒無事
秋樹根前話一場

磁州城下晚眺

紅是藕花青是柳
高爲城郭下爲湖
愛看河北佳風景
全仿江南舊畫圖
十里秋光環睥睨
一川水氣盪菰蒲
征鞭小駐應相問
如此烟波幾釣徒

宿豐樂鎮

旱澇頻年地廢耕
畿南萬戶望秋成
無端耳畔聞豐樂
不爲同鄉也動情

宜溝驛

蕩陰黯黯起風雲
懷古重來對夕曛
慘淡衣冠侍中血
精嚴壁壘岳家軍
朝廷忽小千秋恨
忠義雖艱百代聞
寄語海濱諸將帥
好修武備策奇勳

新鄉小吉寨過故友杜榮三太守

來錫之門悽然

有作

春闈回首共琴尊
尊盼我乘輅一過門
辛未同分校日君云放南省差必過其五馬還鄉新鬼大隻雞爽約故交存職清屢擬絲綸

仿潛齋詩鈔

卷十一

六

制書妙真無筆墨
痕君直欄垣以書名放朔平府卒於家都下驅歌猶在耳
高風已作古人論

榮澤口渡河

榮澤風迴兩岸秋
布帆安穩渡黃流
狂瀾善徙奔千里
奇策難行棄數州
歲擲金錢中國患
民營巢窟聖人憂
旅懷輾轉難成寐
枕上河聲吼未休

過鄭州爲孫師竹觀察

欽昂賈仲選太守

萬青郭

仲訥吏部

介田分寄家書口占

平安傳語怕沈浮
岡路如環出鄭州
客久時時添別趣
今朝專作寄書郵

自鄭州至新鄭行深溝中僅容一輿旁皆土山壁立俗呼夾山溝約百餘里乃盡

溝旁峭壁列峻嶒擊輅旋轅兩不能天露微光如坐井人愁深谷未為陵渡河陡覺平原狹設險幾同武備增遠望連村多夾寨當年困賊助揚鷹

自許州至臨潁道中作

許州兩舍來臨潁落日平疇一望開地下已醒三馬夢寢中欲起八龍才前驅負弩遙相望往事擔囊大可哀連日經行昔年鄉試之路敢道微榮稽古力邊隅著眼拔真材

過螺河舊館為昔年阻雨處

仿潘耒詩鈔

卷十一

七

十六年前路泥中蹶屨忙竹林宵斷酒著積曉充糧同小川叔資斧將盡裹足霖三日回頭夢一場乘輅門外過驛柳耐炎涼

西平縣題壁

不識西平縣征車始一來鄉音淮北近秋色汝南閑骨肉緣長在昂軒叔在遂平授徒風塵念早灰白雲望親舍歲臘喜重回

抵遂平與昂軒叔夜話

書聲蓮幕裏臣叔本非癡各把塵容認相逢客路歧萍踪杯酒合絮語燭花知努力文章事秋風一戰時

駐馬店壁書數語極言隱士起居之適率題

郵亭名駐馬店小亦清涼薄醉茅柴酒高眠秫稈牀誰書招隱語我得養生方一覺還行役詩成又夕陽

確山戴鐵珊大令文海出冊索書為題長句用冊

中黃牧岑庶常和韻

驛路新秋爽氣生是日立秋花封地靜撒矛英前月鄉有匪警詩人為政無難事仙吏憐才有至情吾鄉介無過鄉諸太史皆從游乘興刺舟來訪戴論交傾蓋得逢程徑思借讀牛腰卷酌酒焚香一快評

明港驛卽景

仿潘耒詩鈔

卷十一

八

門對荷塘暑不侵彎環村路隔深林老牛揩痒翁酣睡都趁高槐一樹陰

信陽州寄家書與笙堂並勗以詩

我未乘輅君下第牢騷詩句詠頻年桂林已覺持衡晚梁苑還期拔幟先應舉文章爭絢爛傳家科第起聯翩棘闥屈指中秋月兩地相看一樣圓

終夜大雨次日未行題館壁

雲山繞申息烟雨接光黃南去皆秋色東行即故鄉迎

遠師仙閣冷館外有按粵使星忙將母詩人意就征竟未

晚眺河干水勢愈大

萬壑流泉就下行
瀕河新漲兩堤平
竹篙刺水深無底
秧鼓連村震有聲
人祝豐稔欣得雨
客愁濡滯欲占晴
來朝霽色開芳甸
我與田家各慰情

偕石峯登凝瀕閣

一寺臨河岸相看
覺有情鄉音僧共話
古蹟客閒評
橋板停人渡
廊橫板橋水涸始用
燈花倚佛明
問津道旁叟驚指大波生

憶笙堂弟

路僅離鄉二百里
勢難迂道九回腸
凝瀕閣外蕭蕭雨

仿潛齋詩鈔

卷十一

九

竟未邀君一對牀

冒雨行六十里至李家寨

雨猛多奇景雲奔少定形
山盤沙路白水灌稻畦青竹
箭綠成海槿花紅幾星籃輿幽賞足總覺異飄零

武勝關為豫楚交界

險道無人守承平時漸久
青青夾道山見客齊昂首

廣水驛

一溪亂石列縱橫
水被遮攔作怒聲
難得嶙峋齊著力
留他終古在山清

再至小河司感舊

十五年前此駐車
曾因賊警問官衙
江鄉今為蒼生幸
一路秋香晚稻花

宿楊店新修候館

庖漏安排四壁新
古來八政重迎賓
館僮笑說工初畢
北客南征第一人

和尚橋以僧募建得名感賦

石條穿插密無痕
橋下翻波雨後渾
可惜儒生疏遠略
卻將施濟讓空門
佛稱寶筏應非幻
政有乘輿不是恩
何事塗金工造塔
流亡終未返江村

至漢口鎮住江蘇會館有小園頗佳

仿潛齋詩鈔

卷十一

十

忽得園林勝孤亭
額浩然池通江漢水
花送夏秋天或
結三生契纔增一夕
緣明朝武昌去訪古
鶴樓邊

至武昌凌晴霄觀察卿雲餉茶吾州產也賦謝

家山茶一串雅脫不妨
留烹以秋江水銷將客
路愁詩
懷輕瘴海鄉味重光州
張緒吾同里胡為亦遠
游來字云吾

卿張泉初祠部新授廣西道缺知府

七月朔日出武昌省宿東湖驛

新漲東湖驛沿隄更遠行
水鄉如此好秋意自然生
野寺無拘束江城苦送迎
風前一杯酒差喜晚霞晴

途中易輿為騎至山坡驛

愛他一騎少紅塵雨後看山眼界新不是生平鞍馬慣
廉頗馬援亦常人

驛中芻豆庫中財卻向民間斂馬來徭役吞聲郵政壞
應官何處得龍媒

尖官塘驛卒詭云距蒲圻四十五里實六十里至

城已夜半矣

深宵奔命向泥中走卒偏能詭語工直到拔山人陷澤
始知田父誑重瞳

片言誤聽受人愚此輩安知賦白駒險阻備嘗心漸悟
名場躁進亦窮途

仿潘耒詩鈔

卷十一

十一

途遇驟雨

神龍生長深山裏懶聽人間頌禱文低處斜陽高處雨
陰晴只隔一層雲

宿港口驛萬年庵僧道遠貽詒餘錄皆前此使粵

所題多和吳文恪公

士玉

原韻是夕大雨亦用

其韻

精廬讀罷詒餘錄宵半頻聞雷雨喧風濤頃刻四壁擁
蛟龍十萬空中翻虛檐奔溜勢不止晚稼霑足皆天恩
向曉征輶欲遄發雙溪新漲浸寺門

庵有額曰歇心處坐雨終日作此遣悶

生平奔走江湖路欲歇此心惜無處佛門一笑見題額
方寸湛然達厥故儒者心本異禪心要可借禪生妙趣

禪以清淨歸寂滅儒持定靜應事務功未深時養到難
倉猝閒覺把不住欲心常在腔子裏語亦虛空何所附

出入無時操則存孔門言心善依據否則憧憧擾擾場
安能到處殫思慮運用妙在具虛靈暇必息機戒旁鶩

譬如彼蒼轉玉衡夜深豈復金烏馭勞勞人苦不自知
甌既墮地猶回顧僧廬夢覺驗心光芳草未歇我先悟

贈道遠上人

世苦浮生短斯庵獨萬年詩粗僧酷愛室漏僕酣眠村

仿潘耒詩鈔

卷十一

十一

店人雙屐山程馬一鞭羊樓回望處信宿總因緣

羊樓汎

楚南連楚北中聳戍樓高舊籍憐三戶清時薄六韜陸
城誰保障水國此周遭遙指臨湘縣征夫敢告勞

雲溪驛

耐過連旬雨秋郊夕照明販茶饒土產打稻趁天晴農
力勤終歲山光抱遠城陰雲埽無迹昨夜尚雷聲

至岳州府以行陸路未得一泛洞庭

巴陵勝境洞庭湖陸地郵籤竟異途大好山川疏領畧
可憐與馬費馳驅遠隨鴻雁雪程苦靜想魚龍水氣瀰